

# Imperatura Zita da l'Austria

DA TONI BERTHER, CUIRA

■ **Il 14 da mars 1989, pia avant diesch onns, è morta a Zizers l'imperatura Zita da l'Austria en l'auta vegliadetgna da 97 onns. Ils meds da massa han rapportà a ses temp sur da la personalitad. Il motiv per deditgar ina curta reconuschientscha a l'imperatura Zita è il fatg ch'ella ha vivì en il Grischun passa 30 onns, ins po bain dir sia lunga saira da la vita. Per l'auter n'avains nus Grischuns democrats enfin la crusta strusch da laudar ils de Habsburg da pli baud, encunter ils quals nus avain adina puspè gi da batter entaifer ils tschientaners passads. Jau patratg mo a la sentupada da la Tgalavaina 1499. Ma dapi lura è passads tschintg tschientaners. La Svizra ha dapi lung temp relaziuns amicablas cun l'Austria.**

Zita è nata ils 9 da matg 1892 sco figlia d'ina gronda famiglia da la schlatta Bourbon-Parma. Ils 21 d'october 1911 marida la princessa Zita il duca Carli da l'Austria, successur da l'enconuschent imperatur Franz Josef. L'Austria daventa ils 12 da november 1918: Republica. Già il mars 1919 vegn la famiglia de Habsburg chatschada e bandischada da l'imperi e perda titel e terra. La dinastia aveva regì l'Austria 636 onns davent da 1282 enfin 1918. Questa exiliaziun è stada ina crudaivla e nauscha denigriziun per la chasa de Habsburg. I suondan trists onns senza paus e ruaus. In temp sa chatta la famiglia cun uffants

pitschens en Svizra, per curt temp schizunt a Disentis/Mustér. L'um Carli mora 1922 cun mo 35 onns. L'imperatura Zita ha gi otg uffants. Ella sa deditgescha cumpletmain a l'educaziun da quels. Lung temp abiteschan els en Spagna, essend da la lingua Bourbon-Parma.

Nun stond pli en la glischur publica, daventa la famiglia de Habsburg prest ina famiglia normala, che na dat chaschun a planschs e sensaziuns. L'imperatura Zita è stada in exempel d'ina mamma sco nus avain enconuschì ed enconuschain er tar nus. Dunnas e mammas che s'engaschan da cor per dar a la famiglia ina buna basa per la vita. En noss chantun Grischun ha la davosa imperatura da l'Austria chattà ruaus e sa sentiva tuttina manivel da sia famiglia distratga per l'entira Europa enturn. Ils ses vegnivan adina puspè a visitar ella ed era delegaziuns da simpatisants da l'Austria e d'alters pajais.

Qua tar nus en il Grischun n'aveva strusch insatgi da far insatge cun l'imperatura Zita, ch'è strusch s'exponida publicamain. La polizia d'esters era competent d'uffizi anora. Jau ma regord anc bain d'avair suttascrit la lubientscha da domicil da l'imperatura Zita. I pudeva chapitar, ch'in schurnalist u in'otra persuna vuleva savair insatge.

Per exempel: Danunder che l'imperatura saja, sch'ella è vegnida exiliada da ses pajais? Con ditg ch'ella saja efectivamain stada en noss chantun?

Sut tge ch'ella figureschia en ils registers da la polizia d'esters? Sch'ella haja renunzià a ses titel? Jau mez hai gi contact cun l'imperatura Zita suletmain ina giada, per l'auter plitost cun in figl.

Ad ina sepultura cun pauca glied en igl «Johannestift» era preschenta era l'imperatura. Ella ha fatg l'impressiun d'ina vaira sontga. Ina digna represchentanta da finiziun d'ina monarchia da passa sis tschientaners che ha formà essenzialmain il spiert cristian e cultural da l'Europa.

Ella ha segiramain gi ina dira sort e fatg atras in grev temp, ma ella è sa mussada gronda en sia tenuta durant ina lunga vita en l'exil. Sco ina persuna da cunfidanza ha ditg, assistiva l'imperatura mintga di a la sontga messa ed urava di per di in rusari.

Cun sia tenuta da cardientscha e regnientscha politica ha ella segiramain contribuì blier per la pasch e l'avischinaziun europeica. Ins po bain exiliar e denigrar personas, ins na po dentant betg mazzar il bun spiert. En la vegliadetgna da 90 onns finalmain ha l'Austria lubì a l'imperatura Zita da far ina visita a sia veglia patria. Ella è morta set onns pli tard, numnadamain ils 14 da mars 1989. Ella ha enfin la mort mai renunzià a ses titel d'imperatura da l'Austria. La sepultura ha gi lieu en l'Austria l'emprim di d'avril. La Svizra ha segiramain agì prudent cun dar domicil a la davosa imperatura dals de Habsburg.